

四庫全書

集部

欽定四庫全書

集部

儼山集卷一至四

詳校官庶吉士臣李如筠

中書臣劉源溥覆勘

總校官庶吉士臣何思鈞

校對官助教臣卜惟吉

謄錄舉人臣蔣雲師

欽定四庫全書

集部六

儼山集

別集類五
明

提要

臣等謹案儼山集一百卷續集十卷明陸深撰深字子淵儼山其號也上海人弘治乙丑進士官至詹事府詹事兼翰林院學士事迹具明史文苑傳是集為費家徐階文徵明唐錦陸師道諸人所論定而其子國子生楫為

編次而刊行之錦及師道並稱尚有外集四十卷通此二集為一百五十卷此本不載外集皆其筆記雜著又自別行也史稱深少與徐禎卿相切磨為文章有名書仿李邕趙孟頫賞鑑博雅為詞臣冠徐階稱深以經濟自許在翰林院在國子監數上書言事督學於晉叅藩於楚旬宣於蜀則皆有功德於其士民而惜其獨以文章見費家亦稱其以剴切

不諛忤宰臣左遷以後畧無感時憤俗之意
而舉其發教巖詩峽江道中詩證其無所怨
尤今觀其集雖篇章繁富而大抵根柢學問
切近事理非徒鬪靡誇多當正嘉之間七子
之派盛行而獨以和平典雅為宗毅然不失
其故步益亦可謂有守者矣乾隆四十三年
九月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

儼山集卷一

明 陸深 撰

賦 五首

瑞麥賦

僕閒居田野多見瑞麥兩歧三歧至五六歧彼九歧者得於傳聞殆未之見云實有之感茲休禎作賦一篇有頌有美有風有刺義主勸戒附於古詩人之譎

諫雖不足以希蹤相如子雲庶東京之流亞也示我同志靡得而布焉

天子正德五祀孟月維夏知知子瘍發下體更朔新愈有客唁焉登堂三揖乃掀髯吐論曰夫物有異產事有奇遭談肉者不可與論味昧采者不可與即文濶哉希乎今茲之所覩也子足良苦抑未之知乎知知子蹙然而起危襟橫几奉客下風曰唯唯願客詔之客曰走故農家五穀是理爰自弱齡勤厥四體今年逾知命而豐

穰凡幾一畝三石稂莠吐米皆未若今歲之為瑞也麥
苗芄芄穰岐為二揚芒含穎復為三四多者五六將將
覆地東鄰一莖九岐尤異殆淳和之所薰蒸而上帝用
以錫類也周書異畝漢歌兩岐陋昔人之誇詡昭后皇
之惠慈雖蒙白之翁負玄之老皆緣畝玩視相與嗟咨
若走者齒髮猶盛涉歷未廣宜乎驚悸而矜頤也知知
子仰屋太息索然久之曰否否客何談之盤也夫緣物
者貴質敷文者適用且夫麒麟之希難以療饑芝菌之

祥難以充庖雲錦之爛難以禦寒蠶蚌之光難以續膏
是以聖明抑難得之貨壅不稽之言誠以重本而緩末
棄無益而即有用也客幸目覩岐麥津津稱瑞民瘼甚
矣果誰之致獨非客之所觀見者乎試為客語往歲已
已運厄元元夏耘被壟淫雨注天晝夕閱七颶風相牽
海波怒而山立江潮噴以駿奔蛟龍舞於街衢岡阜淪
為漭淵漂尸橫野浮畜蔽川千里一壑萬竈絕煙於是
百年之完聚連邑之生全化為魚鱉葬于鯨鱣者殆過

半矣暨乎水退民失故居滄桑一變形勝都非朱門沈
其閔閱碧瓦蕩為丘墟鳥窺巢而不下狐訪穴而重疑
號哭振野提負沿途父棄其子妻別其夫相與轉徙乞
丐奔逐投依若流星之逼曙而敗葉之辭枯也於是強
有力者牢朽材於古岸塞行潦以腐薪依濕林為棟幹
綴敗席為閭閻溷爨無別臥食不分什併為五棄仇講
鄰相依為命枵腹連旬野無留菜樹不遺根微倖於萬
一苟活於旦昏爾乃積陰鬱結隆冬盛寒層冰千尺竹

栢枯乾豈祝融之故都為玄冥之停驂何曖曖之陽國
顧風烈於塞垣民無夙具習不素安於是受凍而仆者
又如干矣天子方軫念南服融照閭閻發德音大王言
貸常賦闢四門封簡書於芝檢勤使者於輜軒省太官
之供調減司寇之坐論賑倉廩之儲積蠲逋負之浩繁
方將奪民命於溝壑續生氣於遊魂蓋三五之罕有而
二氣所不能全之曠恩也良有司方憂經費之不足懼
考課之殿後鴻澤持而不下限令疾於電走朝四莫三

示一藏九使民破十家之產僅足以輸一家費數畝之田未足以賦一畝笳鼓盈村擾及豚狗爾乃制為嚴刑迨及黃耆巨木囊頭重金繫肘臂無完膚指欲墮手谿壑之填未厭伸暴之門何有於是孑遺之民瘡痍之末斃於敲扑困於征科者蓋淪胥以盡漸不可久矣戾氣醞釀蒸為疫癘方且乘陽發騰獷不可制今枕藉而病臥者比比皆是招醫降巫若憤若醉是其凍餒蝕於胃腸刑罰慘其心志發雙伏而並攻何方藥之能治厥禍

方萌殆未知其所至也使壟畝之植一本而十岐共帶而百穗將安救之而客誇以為瑞哉且菽粟所以貴於珍鼎布縷所以加於玄黃者為其有用也今夫用者徒存而用者已亡是謂隆虛而病實忘遠而娛細矣僕竊為客贅而不取也客聞而憮然曰噫嘻有是哉子之迂也信乎執一者未足與權二泥彼者不可與適此子徒鑒於己己之變為流而不止乎是殆滯於陰陽之迹而未深於斯理者也且夫於穆之化圜運不已剝終必

復泰因於否吉凶互尋禍福相倚夫蟲之蠕蠕也不屈
不發地之隆隆也不伏不起數逆斯通氣順乃死是故
九載之水或以成堯七年之旱終以啓禹子豈知夫凶
儉之後繼之以豐稔登進之漸承之以君子耶然而氣
機橐籥必有攸始兆先於物發遠伊邇鐘鳴而隕霜礎
潤而降雨走誠得於俯仰之餘是以釋近憂而崇遠喜
也且夫麥備四氣實首五穀詩人頌其於皇下氓賴以
率育續歲功於發春函潛氣而多淑是休嘉之先露後

斯理於將復示帝心之仁愛啓方來之祉福諒有開而
必繼孰無徵而迺獲走且與子託丘壑以優游咏皇風
之清穆是故有取於麥岐子何責之備而論之刻叶耶
知知子不能難客乃躡履而退曳杖而歌歌曰麥秀兮
多岐覆瓿兮纍纍彼其之子曾是兮弗思於是知知子
返乎潛室沈思淵默緯情愫於渾淪抽端緒於開闢推
玄化之始終考休咎於遺冊覽春秋之所書測消長於
三易道有殊而歸同理既契而心戚然則客之言似亦

未為失也將以厥明戒館客循阡陌辨麥歧之疎數聽
鄰黨之損益問勤勩於三時弔疾苦於緩急於時風輕
景融煙朗霧清謝彫輿却繁纓被大練策溪藤道以童
子從以經生指三汀以東驚遵龍江而緩征瞻桑梓於
原隰拜松楸於佳城睇海氛於極際儼波浪之奔轟感
釣游之舊踪慨歲月之不停諳里墟之蔓延有孤物而
屢更亦浮雲之多態何難樹而易傾悵久寄於異土心
戀戀乎故京方徘徊以瞻眺蹇彷徨而屏營顧見道左

麥穗岐岐本同末異旁無附枝始戟戟以競秀竟變變而莫攜將神工之妙合復化鈞之巧持或雙昂以森矗或左右以紛披或越畎而希挺亦共房而駢垂薄長颯以洄洑照圓景而陸離等比翼於異類嗤連理而不為固物薄而稟厚騰衆喙以增竒胡哲人之超軼隨所如而見疑昔宣尼之瑞魯匡人恠而圍之比干之忠殷曰不祥而戮尸彼二聖且猶然般懼此又何辭抑軒輊之偶致將彼蒼之有知於是歷覽既倦義馭未疲攬厥穎

異采掇以歸洵皇澤之滲漉拯黎民於阻饑託子墨以
宣秘聊洋洋以陳詞

南征賦

空同子陽明子同日去國作南征賦

亶肅肅以宵征兮悲往路之未央懼中道之折軸兮思
改轍又惡夫無良顧僕夫以先後兮喟河廣之誰航瞻
桑梓之翳翳兮孰云忍捐夫故鄉方青春之駘蕩兮何
雨雪之縱橫白日匿其耿光兮鬱浮雲以翻揚睇山川

以無極兮陵谷杳乎其孰明叶祥狐嗥而風厲兮何有
於噉噉之鳳凰昔宣尼之遑遑兮固蒙笑於楚狂展直
躬以事人兮卒三黜乎舊邦慨殷室之多賢兮王子剖
而信芳苟璞玉之終在兮雖屢刖又何傷謀人之國兮
焉有禍而彌藏覩巨盜之乘垣兮固將謁之以峻防謂
余夢寐之顛倒兮豈敢幸其必當黑白之同體兮蓋昔
焉之所常憚嬋娟之翹妬兮吾安忍刈夫清揚彙締綵
以禦冬兮疇駕尤於寒涼狎逆鱗而批之固以不碎為

慶^叶也斥虎之使逝兮遭反噬未為殃也印衷之洵安
兮初未量乎得喪^叶曩委羽於東海兮奚成功之可望
矢貞心之不泯兮瀕九死吾猶恒昔淑媛之見背兮竟
結髮之難忘悵恩情之中絕兮往將灑掃乎室堂彼良
農之俶載兮力刈乎莠與稂誕嘉穀之離離兮竟收功
於千倉度中流以失楫兮豈俟共載而助勦燕雀安於
焚棟兮斯物知之不長服先哲之明訓兮希旁燭之煌
煌神龍之淵天兮諒所乘之允臧步中夜以顧瞻兮皖

牽牛與七襄永相望於咫尺兮庶精誠之可將仰天閭
之九重兮冀羲馭之回光魂怳怳以上征兮蹇徘徊而
彷徨亂曰桂車蘭軒服騏驎兮登高臨深送征人兮懷
芳握馨遺心親兮瞻望弗及涕泗零兮

弔劉生賦

唐士劉蕢燕產也感激殷憂有薊丘易水之餘烈以
直言廢故有祠祀直言也在今昌平皇明正德之六
載中月南至史官陸深共承陵祀道出祠下顧瞻徘徊

徊乃述賦焉

洵劉生之瓌偉兮已亮夫言出而禍隨誕樹虛而賈實
兮紛振古之共悲測彼蒼之倚伏兮嗟生獨罹乎此時
也當明庭而鋪詞兮既已謝乎無媒也苟忠信之自印
兮又奚必開金石而稱竒願韜卷以有篋兮恐歲暮之
難期凌冰雪以北度兮敬弔生之芳祠空蘋藻於寒沍
兮悵瞻邈之何遲吁會合其猶然兮羌昧已而前之塞
河決於微穴兮當狂瀾之既積貔虎逸而負嵎兮欲徒

手以徑批臨深淵而莫戒兮聳旁觀之屢疑佩宣王之
昭訓兮亦有道而言危曰余既知夫隱衷兮冀身却而
道垂謂將來之可恃兮竟陳言之誰施蹇歷生之故墟
兮睇西山之崔嵬尋采薇之舊踪兮路逶迤而多岐風
號寒而木怒兮恍有過於斯須情抑鬱而欲語兮魂靡
靡以難持儻決機於轉圜兮曰獨生之所私

後灑灑賦

昔蘇公子瞻賦灑灑蓋曰江會百川勢易驕逞不先

之以齟齬盡其快銳為害斯大嗟乎是誠有之夫當
國家豐亨豫大之時必有風靡波蕩之俗使無正人
法家出氣力以扞之則末流有不可救者矣此公作
賦之旨也嘉靖丁酉二月初子將出峽舟過瞿塘春
水未生孤根欲露盤旋其下有感於心作後灩澦賦
道叢臆之故國沿岷汶之長源睇灩澦之兀律繹先哲
之名言測安危之倚伏乃始疑而今信然昔伯禹之導
江兮命陽侯為驅先挾六龍與二虬兮劈雷斧之神鈿

劉地脉而中分兮挺孤高之一拳障犇轟之東驚兮回
萬折於瀾翻時盈縮以浮沈兮擁百川而獨尊或如象
兮如馬舟人睨而不敢上下相逝者之汨汨兮固晝夜
之不舍惟上帝之默佑兮恒斡運於區中示機緘於錯
糾兮物有窮而必通猗宣父之感麟兮既伐樹又絕糧
羌鄒孟之仁義兮竟見沮於臧倉胡賢聖之迭遭兮夫
豈茲堆之未汰派遠而彌昌兮象下流兮永賴抱遺經
而先覺兮返亂治於否泰顧大化之茫茫兮俟萬世於

須臾俯中流之一柱兮盍前鑿而蚤圖慨孔明之馳驅
兮磊砢乎八陣猶未磨問草堂於灑水兮弔江上之東
坡子粲粲其白髮兮懼末路之蹉跎

宣悼賦

陸子羈旅兩都三年之間四哭子女天永地厚控訴
焉如作宣悼賦

歲靡靡以于邁兮嗟繼續之未昌曰子遭迴之可哀兮
何歲三改而四殤背鄉井以遼邈兮囊又告予以屢空

謂彼蒼為不仁兮先哲重之曰降祥將余戾之日積兮
情不知其內訟抑修短之冥合兮長辛楚又奚用登高
臺以舒嘯兮淒北風於襞縫涕既掩而復隕兮雲空興
而四涌豈余目之眇昧兮心悵恫而不舒俯危闌以佗
僚兮恍何物之滿裾迴曲房以偃息兮若有聞於欵欵
顧父子之至情兮孰云排攘而獲疎謂昏為旦兮謂日
為年胡懼愉之易終兮而憂戚不可以延諒后皇之終
惠兮恐日暮於虞淵反予袂以自持兮承慈顏於堂前

儼山集卷一

欽定四庫全書

儼山集卷二

明 陸深 撰

歌一十八首

紅白蓮歌

白學士秉德
池亭分題

白家池館薰風裏恰在香山最深處池流曲曲暗通泉蓮
葉亭亭齊覆水花紅花白相間開香風香氣四邊來乍比
珊瑚出銀海還疑瓊蕊下瑤臺銀海瑤臺俱可憐仙舟一

葉渡晴川素心飽露秋同月豔質凝脂曉破煙歌罷江南
不知暑渚平沙暖新添雨江妃映日試紅粧楚客因風搖
白羽別有風光傍晚看遙山流翠入闌干四面畫屏相向立
一機織錦亂交攤主人个時玉堂退紉扇綸巾坐相對
靜虛如此可論心芳韻于今應作佩論心作佩總堪誇
不愧名稱君子花記得金鑿送歸夜分明一朵隔籠紗

魯橋熱

赤日行空正當午老夫畏熱如畏虎計程歸路三千七

值我行年六十五昨過任城舊酒樓山川信美非吾土
仲宣太白俱仙才安得並載黃龍浦此日池塘楊柳風
此時庭院芭蕉雨牙緉架插餘萬卷衮鉞心傳破千古
滿座時看羽扇搖半酣起拂吳鈞舞已約清風成故人
更須霖雨歌明主回瞻殿閣憶微涼却向園廬依茂樹

秋水篇

江南潔修多水芳紫菱翠荇下銀塘銀塘遙接芙蓉渚
曉粧亭亭沐秋雨摘花美人雲錦裳鬱金香佩雙鴛鴦

家住湖南碧灣裏，碧煙如紗拍湖水。少年射策蓬萊宮，
文彩隱映芙蓉紅。珊瑚十尺空自好，靈芝九莖何足道。
一為君歌秋水篇，濟川穩汎木蘭船。若論顏色休嗟晚，
竟堪持補君王袞。

楊妃病齒圖

沈香亭畔催花鼓，華清宮中翠盤舞。瓠犀半啓櫻桃顆，
可是玉魚偏作忤。似將一掬黛娥顰，翻取三郎斷腸譜。
歸來南內情更多，一曲霓裳淚如雨。

石齋歌

少師揚公之以石名齋也學者稱之曰石齋先生蓋
有年矣客曰公博極羣籍尤深於易不俟終日取其
介也又曰公家本蜀竒偉秀拔之觀蜀實有焉著之
心目示不忘也門人陸深獲周旋齋中問學而退嘗
深思之夫道以濟時為上物以資世為賢故聖人不
寶難得不作無益遠觀近取凡以致用也今夫用石
者博矣其細者不論清廟明堂之建負荷而底定者

是曰柱石疲瘵殘疾之人延起而安全者是曰藥石
盛德豐功之著刻畫以傳不朽者是曰金石盤石以
言其固也鐵石以言其斷也彼甲乙之品袍笏之拜
是玩物矣又君子之所弗論公碩德重望鎮物礪世
其取諸石也非深之所能知自今觀之相業柱石也
言行藥石也文章金石也使宗社有磐石之安處大
事決大疑確乎鐵石之操石之用大矣備矣作石齋
歌歌之

關西夫子今元老有石當齋齋更好疑從天上墮支機
似向瀛洲擘瓊島磨礪堪為百世師璠璣不數連城寶
星光璀璨太白精雲根萃嶽西川道早年克貢來明庭
玉堂紫閣靜儀刑擎天八柱開黃道障海千尋掣巨靈
有時條理振韶夏百獸率舞游魚聽孤標共仰積鐵壁
大手為勒磨崖銘授書空傳穀城叟漢室開基一培塿
何如五色補天材元付當年取日手石齋峩峩高入雲
四海蒼生共翹首萬年水藉聖朝安再拜為歌仁者壽

寶絲燈屏歌

鮫人夜織冰蠶絲不數細滑鷺溪絹或云并州快剪刀
剪此一段澄江練乃是雲南之南萬山中雲腴石髓蟠
青蔥酒黃鴉紫祖母綠復有無價桃花紅遠人不貢車
與服持此射利如射鵠遂令長安富豪家下視隋珠賤
和玉瑣屑璀璨星宿同水碓火鎔俱有功短長曲折巧
應手無乃鬼幻神為工分經錯緯了不亂各以本色呈
絢爛霞蒸霧滂有無間遙看一道晴虹貫是中白膩若

可餐良工點染開林巒似嫌世上縑素弱頗有勁氣生
毫端製成屏風向燈夕聊慰風塵遠為客壯心豈解隨
物遷鄉書又送經年隔酒錢不愛典衣償要與明月爭
輝光但願明月長輝光

三松圖

可齋鄭宜簡抱負偉竒身通技能俱造精妙使推而
致之可資經濟之用而宜簡甘自隱約於農賈之間
不肯少露一斑往年游京師館閣巨公與諸學士史

官暨當世名流頗有知之者而宜簡益自韜晦嘗告
予曰道之精以為身也他非所望今年六十矣日修
孝義之行若以祈天永命然者使仁者必壽其殆斯
人與乃題三松圖壽之

三松亭亭高插天離立森爽含風煙棟梁廊廟似無用
撐架日月如有權渾疑無地着此物日觀其下天壇前
秦時大夫封不受漢家武皇來何處潛龍卧龍差可擬
鱗鬣頭角俱依然懶為行雨六丁怒彩虬金電揮成鞭

有似高人傲一世寧舍富貴耽沈玄師山孫子今奇士
家住萬山蒼翠邊曾中惟儲秘書監囊裏不貯司徒錢
手種青松一萬樹如此三樹尤堪憐風雷掀舞山嶽動
歲華剝落冰霜偏古栢空傳二百丈蟠桃浪說三千年
有時坐石聽涼籟獨把黃庭金字編神仙官府總一致
朝中宰相山中賢題詩一寄可齋子會見滄海成桑田

蓉溪書屋為金司寇

蓉溪江山真畫圖蓉溪主人絕代無往歲西歸結書屋

風前月下聞伊吾牙籤插架幾萬軸雲錦照水三千株
有時谿頭風日好一段秋波淨於掃水香花氣相氤氳
人間別有蓬萊島蜀道時歌李白難草玄甘抱揚雄老
只今身復上天衢太平經濟須巨儒尚書省裏少司寇
御史臺中上大夫共道孤芳持晚節還應廊廟憶江湖
別來幾度花開候每向西風重回首補成五色袞龍衣
元是當年摘花手復有堦前蘭桂行相期歲暮松筠友
君不見南陽草廬綠野堂此溪此屋同垂芳

渡淮放歌

出門江南花無數行盡淮南春欲暮風霜添上鬢絲繁
頗悔從前好詞賦伊吕分明道可行孔孟咄嗟時不遇
故人衮衮俱公侯頻歲勸子勞尺素亦有封章達姓名
曾傍重瞳屢回顧憶昨素冠成陛辭天子中興初踐祚
八年林卧心常懸一捧部符躬莫措玉堂天高舊夢回
青宮地切新恩誤萬分何補等涓埃五十無聞昧時務
憑將一出期遂初自保孤忠總如故長河濁流足風波

飛鷁揚舲競津渡攜家十口兒女情居安慮危在雲路
遙持一寸報主心時放歌聲和韶護

呂梁洪

青山天矯如渴龍墮地直走河流東岸崩谷應氣猶怒
其下必有鼉鼉宮舟人估客盡回首篙師舵手俱神工
人言大險亦大勝如此江山須畫中宣尼南游鬼物出
伯禹東導神靈通天地何心世多故劉項曹呂皆英雄
聖皇恃德不恃險萬里衽席歌同風我來其間正初夏

片帆遙映斜陽紅風旛前麾影接岸水檻下視波連空
肩輿十里據高坐始信靜處觀無窮

大風宿畱城

身世浮沈如一舸一日千里十日坐順風人喜逆風怒
我任天公何不可隨身所到一問津去者從右來從左
古今道路無不然自有亨衢自坎坷黃泥岸高綠樹深
遙望前船密如鎖爭先疾趨古所戒夜宿澄潭傍漁火

寶應湖翫月

我生愛月仍愛奇，着意欲到西湖西。不然具區三萬六，
千頃坐此一色銀。玻瓈今宵寶應湖，南路桂魄皎皎風。
淒淒水光四接上下合，冰柱十尺雲天低。樓船不渡南
北斷，危檣密鎖烏鳶棲。我攜二客恣清賞，試選高岸成
攀躋。弦光滿射白玉鏡，斗柄倒浸青雲梯。人間天上非
還是，翻疑海外聞天雞。瑤華臺殿雲母障，水晶宮闕黃
金泥。胡床老子興不淺，揮手弄影沿長隄。菰蒲何心爛
不起，鮫鱷有恨蟠猶啼。南中卑暑不耐冷，况復風雨尤

難齊茲行所得差足慰未覺嚴沍欺袍綈人言春月勝
秋月春月花柳空萋迷爭如冬月有勁氣復此淮海水
連谿酒懷逸興俱浩蕩霜明雪映工品題君不見漢家
中郎持漢節風槩凜凜海上甘牧羝

和王元章梅花為段主事子辛賦

畫堂六月飛嚴霜客持此幅梅花芳乍窺疑浮初月影
細對忽麗繁星芒塞垣風高吹石裂嶺南天低不受雪
何似孤山處士家一段西湖弄華月梅花此時殊有韻

金天正元 卷二
青鳥遙傳海山信度水盈盈玉雪膚含風裊裊堆鴉鬢
萬種心情春酒缸起為花神酌一觴誰憐白賁元無價
空復紅芳號假王會稽山農骨已冷夢入梅花呼不醒
巡簷且索屋三間負郭何須田二頃

雪村晚酌圖

為溫宮
論題

崆峒萬木凍不僵瓊瑤一片埋夕陽雲安道上少行客
百花潭西封草堂橋回谿轉疑無路前村依稀後村暮
時見青帘獵獵招如聞白鴈翩翩度天涯搖落空歲華

翠微自有高人家林端紅葉飽茶竈梁上青趺挑畫叉
一斗鷺黃正堪買拍浮好懷同北海不來租吏渾無譁
夙約溪翁如有待川源窅窅古人風幸際車書萬國同
床頭何用紀歲歷門外但送郵詩筒憑誰致此好氣象
必有明君與賢相託齋先生素心人懸此一幅高堂上
畫家畫意不畫形當朝戴進最有聲未歌三白呈祥瑞
先兆六符開太平

南峯書院

為徐良
節題

南峯主人顏如玉更向峯前築書屋虹光夜夜貫斗牛
秀色冉冉連嵩祝復有家傳萬卷餘累朝諸父皆詩書
子雲寂寞空玄閣諸葛經綸有草廬南州高士元同譜
玉樹冰壺映千古風騷共許國無雙韋杜浪誇天尺五
孤標絕壁倚春晴風動芸香滿院生常留雲氣從龍出
須種梧桐聽鳳鳴

龍江歌

壽唐士回
憲副五十

龍江東來萬里道遙接瀛洲與蓬島三江有水剪不斷

五湖無波淨於掃龍江先生江上生德器文章俱老成
曾吞雲夢已八九量比汪陂無濁清登科弱冠人如賈
辭源倒挽銀河瀉砥柱中流力有餘扶搖九萬風斯下
掖垣諫草避人焚憲節西持往校文多少魚龍隨變化
一天星斗浸寒雲雲間自愛歸來早蓴菜鱸魚舊盟好
閒看秋影澄道心坐見紅塵揚碧草碧草紅塵閱歲年
宣尼當日正知天終同渭水非熊兆會起浮空萬斛船

瀛海圖為李宗易諭德歌

天南咫尺帝城隅，山靈水秀相盤紆。中有瀛海接銀漢，
吞九雲夢涵五湖。太行西來走其下，排列七十二朵青。
珊瑚微風吹波縠，紋淨明月照影驪。珠孤汪汪千頃蕩，
星斗上一一碧隨。鷗鳧世傳神龍有，窟宅霹靂驚起頭。
角殊化為霖雨灑，六合波濤壁立風雲麤。須臾光霽變
天地，荏苒花柳呈芳腴。我聞弱流三萬遠，隔扶桑外六
鼇三島空傳呼。玉堂學士李太白家住瀛海真蓬壺，水
心樓閣開雲母。風外簾櫳感浪珠，有時倚檻一長眺。宛

見雲中五色清虛都心曾已着秘書省殿陛恭承子大
夫青錢萬選絕代有白壁連城天下無頻年文場拔董
賈昨歲武舉羅孫吳廟堂自當金玉器鼎鼐竟與鹽梅
俱周家中甫嵩嶽降蘇氏軾轍眉山枯大賢應運重得
地瀛海似也非其徒江南程生近好手點綴金碧工調
朱經營意匠入宵眇翻取商巖舊典謨玉顏丈人古冠
佩疑是退直金鑿趨手揮一籌探海水坐見清淺連桑
榆魯連高蹈帶俠氣仲子汗漫甘乘桴君不見張子房

借前箸為漢驅請看此籌一下能奠萬古之皇圖

題嚴介谿所藏何竹鶴畫

江南五月黃梅雨濕雲不斷生遠水風流太守竹鶴翁
家住江南水雲裏興來揮灑出畫圖高峯掩映雲模糊
江迴路轉草堂靜雨崩沙塌谿橋孤鈴山堂中羣玉府
此幅遠淡尤足數憲使先生最愛才玉堂學士真博古
到處護持如有神攜米長安手澤新高人韻士千年蹟
孝子慈孫百代珍

大正十四年

假山集

十三

儼山集卷二

欽定四庫全書

儼山集卷三

明陸深撰

歌二 二十一首

節婦歌

憶昔敵人犯邊日
先皇赫怒揮鉄鎖
蒼天深意在戢兵
六龍暫駐陰山蹕
古來勝負兵家常
土木之變悲莫當
忠臣孝子畢誓死
長纓徒手繫名王
維時張公忠勇士

肉骨藁葬蠻荒耳隕星莫想諸葛生落日凋戈揮不起
中閨裁罷寄征衣征衣一寄不曾歸東海深深精衛苦
九疑淚盡山成圍折釵分鏡甘獨守寒影遺孤成左右
紅顏白髮須臾間長夜玄堂重執手遺孤無怙亦無恃
期以功勲光後祀星聯八座位中丞重譯威敷雪前耻
誰云網常一日無嗚呼忠臣爲君貞婦夫憑軒涕泗聲
嗚嗚

開河待牖苦熱

長江無六月此語為誰傳筠簟紗厨裏何人不可憐我
家本在三江上竹樹成行更森爽畫閣含風蘸水開仙
槎到海隨潮長波搖雲夢通具區地接蓬萊與方丈何
似黃塵千尺高脫巾羣飲總稱豪銀床玉井無由覓赤
脚層冰何處逃徒聞東郡泉千派不濟南湖水一篙臨
流欲渡還晞髮待看西巖吐新月萬貫誰纏鶴背輕一
蓬自笑鳩巢拙人間合有清涼方半捲湘簾坐超忽君
不見陶潛釀秫兩疏賜金懼此毒熱聽我吳吟

星月歌

元宵自戴子克冬官小酌還卧養菴夢中得詩憶其
首聯云大星無光月如水碧空無雲千萬里晨起櫛
沐頗用訝歎適小野春官見過遂舉似之小野今之
雅才首肯賞音云突兀不類常作因加竄足成為放
歌庸拓旅懷

大星無光月如水紫煙辟寒天萬里金吾木柝聲不驕
火樹星橋接空起恭承休假作上元滿目韶華帝城裏

團團三五宵可憐淺薄一分春奈爾胡床浩興空昔年
秋色不似長安妍五鳳樓前迎萬乘六鼇海上擁羣仙
歡遊祗厭春更短欲挽空壺涵百川機中紅雨催花落
天上青娥妬扇圓九衢羅綺人如蟻五侯甲第黃金炬
底用還鄉作畫行真堪窮漢經年賁別有工夫巧奪天
製成二八當牕女迴紋暈采剪越綾五色含光漏湘楮
雲母琉璃俱有神銀河牛渚恍通津常拋金彈誇豪俠
獨抱明璫泣蜃人火具時時聞戰伐飛流一一繞勾陳

誰家簾幙留歡住幾處笙歌按拍新節物人情豈相待
後夜遲遲出滄海每驚舊髮羞鸞鏡却倚新聲填款乃
仙人自古有羨期書生妄意圖元愷但祈燈月兩相和
歲歲年年常不改

秋日入余山觀昭慶三枯松

雲間山水稱絕竒簡遠開豁無不宜村村花柳足佳麗
亦有落落蛟龍姿新秋晴日照古寺鳴絲偃蓋風離離
閣前兩株踈且瘦左右拱揖如佳兒獨憐衆草沒曇院

不見十尺圍桐皮稍偏一株在東麓蒼翳拔起三虬枝
擎空似欲擎雲雨匝地更與成漣漪我聞佳樹以地貴
豫章赤水非人為雲間栝松重昭慶往往盆盎時見之
此來得共恣幽賞山深谷暝何遲遲未嗟才大難為用
頗恨地僻稀相知摩挲風霜有古意指點時代多遐思
東廊一僧最朴野導我屋角開重籬為言秋高八九月
風前落子堪萌滋邇來區賦要往役此事久廢從先師
山中歲月已如此世上風波紛路岐坐成三歎倚石壁

欲別未別空猶夷蒼髯戟戟老髮禿白雲冉冉游絲垂
此山九峯居第一誰為姓余誰所遺或云種茶似陽羨
吳歛楚調聊相隨陸家放鶴還沙際張季思鱸今水湄
他日青松能待我茯苓琥珀總宜詩

悠然亭

濠梁有魚水莊惠無爾我吾猶恨多事忘言豈不可俯
仰天地同悠然魚忘于水水忘淵澄鮮一色月轉漢潑
刺數聲風起船封君本是方叔後老氣盤空薄牛斗長

嘯江湖范蠡書逃名松菊王弘酒庭中潄泉泉上亭亭
外萬疊青山青有時出雲作細雨此際游小開南溟坐
來一日當千日未論他年百四十海棠花發春氣濃一
片胭脂鏡中濕

赤壁歌

我聞赤壁乃是曹劉之戰場襟鎖巴蜀喉控荆襄丹
崖插江幾千尺疑是燬爛半面之崑岡下有波濤走萬
里上有椒桂森衆芳紫苔爛斑伏虎豹紅雲縹緲遊鳳

鳳當時烈烈南風發北岸舟楫灰飛揚蛟螭失勢易為
縛何奈太白多寒光時移運去疾流電江山如故天蒼
蒼平生好竒癖山水夢寐彷彿徒彷徨昔有蘇子瞻來
自白玉堂扁舟夜載七月涼月明把酒酌周郎英雄多
有恨涕淚徒浪浪爾來數百載勝事不可常陶子五月
使瀟湘殷勤請戒十日糧黃州弭節聊徜徉須凌絕頂
出上方翹扶桑兮俯八荒清風時來聲琅琅為我一誦
秋水章

子醇雨後陪宿道館有贈

春燈着花照春雨窈窕仙宮對床語龍池冥冥雜花寒
魚書鴈信多愁緒一百五日又已過二十四橋何處所
容臺美人錦繡腸能為楚歌歌白苧候我明光起草餘
更約城南看花侶長安風塵緇素衣故園魂夢牽春渚
三軍草露白鐵袍五侯宅第黃金炬聞雞起擊珊瑚鞭
共慰此身同逆旅

夜泊真州

前歲泊船真州江滿船明月搖船牕今年復向真州住
黃昏待月月欲吐明月照人無醜好來來去去令人老
一杯船尾得月多聽我試唱真州歌真州歌將奈何大
船如屋船船官齶危檣插空飛不入鐵鎖鉤聯密如織
語音嘈唧了不分同是經商異南北居民大半趨四壩
倡女浴河晚糴罷短擔雙簷喚賣鮮小舸三槳輕如駕
連樓夾巷簇簇新家許住異鄉人共道今年生意少
下客折本上客貧江南春山疊疊綠荆楚轉運遙聯屬

南京供奉日日過金字黃旗去還續君不見文信公幾
陷虎口中但願路日通不怨東西逢逆風

雨後於都司分種紅蕉

今日不知來日事百年枉作萬年圖青青一種芭蕉樹
春雨敷榮秋雨枯憶昨歲晚雪飛白都閩門墻映紅碧
依稀記得建陽過南北東西總為客建陽縣令薛給事
開尊北堂邀我至對花云是美人蕉不怕風霜逞嬌媚
前月京師附書還為傳給事死諫官見花憐花為花惱

萬丈雪山毛骨寒都司劉郎舉武舉每以危言動天子
螭頭豹尾不肯畱獨鞭花虬行萬里萬里邊庭絕羽書
手種芭蕉三百株一宵蹄嚙苦不戒粉碎玉人傷綠珠
共汝朝來有歸興細雨沈沈滿三徑攜鋤斫取舊根荄
且種窻前欹枕聽

題李蒲汀學士所藏趙千里射熊圖

王孫藻思錦繡紋點染青山縈白雲避鴈霜高錦樹出
射熊風勁角弓聞似是西原獵場下公子翩翩齊騁馬

捷如流電氣十倍滿彎明月神瀟灑沙平草淺石徑長
左馳右突不可當直前一發遂得雋豈但百步能穿楊
古來妙傳誇絕藝此幅摩挲今幾世周詩藹藹歌夢祥
漢館離離是何處蒲汀學士人中龍勘畫披圖最有工
致身本在霄漢上雅興時落山林中武功文事亦素具
細認丹青有竒趣尚父曾聞載後車宣尼尚且供先簿
試看更兆掌中珠雄風駿骨頭角殊他年隔座屏風裏
喚取良工搦此圖

南宮北郭踏雪

前夜維揚翫寒月今朝燕冀寒踏雪百年快事能幾迴
誰料茲行兩竒絕漠漠郊原一掌平紛紛珠貝綴難成
玉堂瑤圃隨行上縞帶銀盃逐步生復有軟輿和蓋重
何似漁翁一蓑凍白馬翩翩千里驕紅旗閃閃長亭送
臂鷹走狗誰家兒頗憶東原年少時雙飛一箭穿雲下
九尾千年匝地馳壯氣老來餘白首熊裘貂帽鷺黃酒
掃竹尋梅何事無柳絮梨花隨處有東方又動朝日紅

耀色流光四望通，矮屋欲埋孤出棟。
遙山先映最高峯，試問天公資發育。
前須異二後，滕六蒼生赤腹望。
豐年黃扉紫閣尤驚目，誰持豎白攻異同。
燮理調和唯至公，不見狡狴巧搏換。
消得東皇一夜風。

文峯歌

為鄭正郎

雲路東南水閩關，紫翠重蓬萊宮闕近。
突兀見文峯，文峯拔地幾千尺。
巨靈夜卓凌空碧，特立疑從五老分。
高標正傍三山出，三山秀色鍾異人。
文峯先生尤絕倫，身

同砥柱障東海力挽華嶽開西秦二十明經取上第六
曹郎署稱無二作雨為霖本有期擎天捧日真能事當
今好手張平山寫出巉巖水墨間美人被服何雅素坐
看白雲相往還先生愛山兼愛畫風物江南兩奇邁停
驂駐節費追陪高堂素壁時張掛舊家門巷對山居共
道相傳百代餘開圖宛見文峯面若論連城玉不如

竹巖歌

為程時言侍御題
其先君方伯號

君不見程公竹巖重新安上有鳳雛雙羽翰下有龍孫

欲迸青琅玕嶙峋白壁連城價搖動清風六月寒美人
歲晚愛顏色身踞虎豹凭闌干祇今仙遊向湘浦唯餘
落月輝林巒調和六琯製大雅鎮壓百里成偉觀孟生
淚盡不復茁唐皇感之比二難江南程氏古司馬別有
伊洛分派如波瀾誰云今人不如昔竹巖太中相應看
仲氏外臺握風紀儼哉伯子和氣端正公壁立幾萬仞
要比季子鐵豸冠四時正氣鬱不改東南秀色若可餐
掃除炎熱礪世鈍一為長歌天地寬嗚呼竹巖不可見

見此孤標遺蔭回風湍

西巖歌

君不見崑山產玉高嶙峋當年一片稱絕倫邇來幾千
載元氣醞藉含至淳乃有參天卓地壁立之西巖窅窅
洞府棲仙真春色桃花誤流水秋清桂樹當月輪紫芝
瑤草滿下界祥虹瑞靄往往早暮相鮮新箕山將讓許
武陵聊避秦遠觀田變海昔傳嶽降神自如先生古柱
史甲第華堂住其趾少年風彩真玉人陸家兄弟安足

齒滿門忠孝世所希江南數作鳴珂里狀元宰相應黑頭
季弟今為天下士大兒文學早作畿輔師直言忠諫
丹青裏小兒穎異似楊修已署門生拜天子有孫行年
十六七一舉鄉書衆中起珊瑚與珠樹過眼紛可喜先
生況是真仙才酒尊常對崑山開消除日月歸棋局舒
卷絲綸有釣臺屨杖登山疾於駕有時臨海望蓬萊玉
耶人耶兩難辨但見秋容秀色遠與鸞鶴相徘徊五千
道德閒常誦三度蟠桃手自栽只今七十逢初度剛是

浮生第一回山中好風日天末負趨陪短篇遙當長年
頌願借澄湖作壽盃參天卓地之西巖永與朱顏黑髮
相追隨

題畫

春風花柳谿橋路賸有韶華管送迎隔岸青山千尺起
聞歌多少別離情此圖點染還清潤似是錢塘戴文進
張公好畫如有神高築金臺同買駿內庭多暇日正長
湘簾半捲當華堂時時拂拭見古意欲效丹青比夢良

雨中汎舟聞座客琵琶

蘭舟急雨橫銀塘水芳沙鳥滋暮涼煙雲彌望接蜃氣
樓閣失地含龍光于時披襟坐盤薄愛聽瀟浙鳴舷聲
座中有客偏好事獨把琵琶臨醉鄉一攏一撚有古意
欲彈未彈先斷腸四弦嘈嘈乍入手似與風雨隨低昂
曾傳青衫泣司馬豈是紫塞啼王嬙孤臣忠憤重離別
壯士感激多慨慷鳴弦鐵撥世希有此曲杳眇尤難當
誰裁無價紫紗襪乃有雙盤金鳳凰我生兩耳才具足

妙解那得如中郎老懷政爾苦冰炭試遣陶寫憑消詳
須臾返棹更東下雲物一空江水長

可泉圖

為胡
大參

我識可泉三十年今朝為賦可泉篇秦川蜀川渾漫爾
相憶相逢俱偶然君家去天才尺咫雲樹蒼蒼萬山裏
羲昊曾畱畫卦文陸郎未試煎茶水當年妙小富文章
春日承恩上玉堂客過每勞占劔氣人傳從此破天荒
一朝汨沒青山下印月行風倍瀟灑遙從西郡夢三刀

又向南臺騎五馬皖城東下是蘇州銀色琉璃萬頃秋
匡廬天外飛猶落揚子江心泥不流濟南突地七十二
錢塘江頭水西寺還將詞翰舊風流總屬參知新政事
一夜秋期夢故鄉某山某水暫徜徉如流車馬來阿曲
似水門庭復晉陽晉陽相看吾已老開圖宛聽泉聲好
白練橫拖萬里長銀河倒挽三山小溶溶漾漾更逶迤
東流終向鳳凰池聊從漢使乘秋日正是商巖大旱時
滿地蒼生望霖雨天瓢一滴何如此由來鄒孟達逢原

安用蒙莊齊物理誰云蟠冢不勝舟誰謂崑崙最上頭
請看逝者無昏旦化作江河入海流

松鶴圖

遙空受秋萬里碧松露團團野花白藤梢橘刺紛陸離
細水涓涓遶雲石我疑此圖是玄圃中有雙禽鳴且舞
霜翎砂頂足生韻玄裳風輕月將午當家妙品在逼真
况是寫生須入神古來高人重圖畫欲令見者常如新
我聞胎仙三千歲摩挲此幅能幾世乃知丹青空爾為

別有不朽超絕藝

枯木竹石圖

人間何處真不俗
雨後山前兩竿竹
雪村老人幽興多
落筆龍孫削蒼玉
離離亂石出澗底
古木壓枝虬欲起
相思天際望美人
月明一片湘江水
君不見工師取才
伶倫裁管兼收並
蓄截長補短開圖
識苦心聽我歌歎
歎

次韻黃如英聽管生彈琴

逸人最愛馮虛閣手弄絲桐自酬酢清安身世甘寂淡
富貴交親供諛噓天空境靜初按譜掩抑悲淒更豐約
淙淙巖背墮春泉歷歷林梢下秋籜緩猱急引大可憐
含徵流商調相錯初聞古意三疊高旋見失勢千丈落
勇如壯士提戈戟靜似佳人洗丹堊吳山積雪開四牕
夜靜金爐火猶爍是時相對擁青綾頓使煩襟坐來鏢
中郎此意妙莫傳炊爨之餘尚堪鑿看君幽興正得意
我和險詩聊善謔須臾鼓罷陽春曲門外青山映寥廓

棟塘為李封君

甬東水樹清深處棟花風動黃梅雨喬木由來世澤家
清溪合有高人主主人本是種德人種成玉樹高嶙峋
青驄白豸風霜古紫誥金泥雨露新苦縣遙宗元姓李
今代聞孫還柱史彈壓爭知重有山門庭不愧清於水
繡斧銀章使節歸摘花釀酒映斑衣明堂正要求梁棟
陸子成林大十圍

和答張子醇索硯

容臺大夫古列仙謫向人間年復年當時正坐風騷客
今日猶為筆硯憐吳東片石青山裏箬裹藤封四千里
力微任重致不多空對知音慙未已看君筆陣何堂堂
真堪作史蔡中郎自須剪贈西湖水化作虹霓萬丈長

儼山集卷三

欽定四庫全書

儼山集卷四

明 陸深 撰

謠 三首

邊城謠

贈王司徒

金木難丑之年大同六月風塵連將軍死綏戰士哭東
芻斗米當十千司徒受命出餉邊綸巾羽扇何翩翩指
揮相載赴急援上山下山魚貫聯營中望見氣十倍技

涕裏血張兩拳君不見丞相昔日下三川木牛流馬何其便司徒之功相後先司徒之功相後先請觀渭上田

卧龍謠

龍卧不行天龍吟梁甫篇借龍何處所行雨遍三川
川山勢常含雨北風不斷東風駛赤龍上天掉龍尾更
遣流星促龍起定軍山中龍骨藏龍光夜夜拂咸陽

石橋謠

一揮千黃金不如一石梁江水險不測人命薄於霜南

州十月水涯降臨流不渡愁褰裳家住江水北市在江
水陽朝渡給薪米暮渡攜酒漿有時浪急石齒齒對面
千里空斷腸東鄰周封君有子登玉堂一朝發私帑波
面流虹光方車結駟若坦道石可泐德難忘

辭 二首

春山辭

贈別何舍
人仲默

登長坂望故都辭帝閣兮南驚渡河梁兮春波時一去
兮難再怨芳歲兮蹉跎赴山靈兮夙約返初服兮苧羅

林深兮春暮草靡兮雲和猿避席兮空谷樹開障兮崇
阿左蘭兮右芷牽芙蓉兮擊蘿聊徜徉兮寤歎澹容與
兮嘯歌望佳人兮不可即眇千里兮傷如何

風泉竹石圖

為楊夢羽
正郎賦

啓玄圃兮纈羣芳淡容與兮翱翔望帝子兮極浦思美
人兮瀟湘幽篁兮恠石泉激風兮鳴璫神舒兮境寂開
葯房兮蘭堂冠切雲兮瑤珮殫沆瀣兮夜未央抱貞節
兮自媚日夏烈兮秋霜羌秀色兮可攬邈江山兮蒼蒼

遊夫君兮太清跨虎豹兮騎鳳凰

行

十五首

沛水行

戊辰
歲

沛水東決如沸湯家家水痕強半墻麥苗不收棗樹爛
雞犬縛盡無糟糠河上丈夫七尺身插標牽女立水濱
自言豐年娶得婦結髮甫能勾十春隔年生女如獲寶
阿翁提攜阿婆抱兩歲三歲學步行鄰里盡誇皮肉好
今秋糧限不過年縣官點夫夜拽船可憐此女八歲餘

卷四
決券只賣四百錢錢財入手容易盡但願分投避饑饉
借問上船何處州異日經過煩附信答言家住越州城
綠樹青山好託生桑樹養蠶常着帛湖田種稻早炊秔
聽罷那禁雙淚流相逢只合死前休聞道越中多賦歛
父北兒南兩地愁

悲開河行

鄞張秀才翰林檢討常甫兄也北來省第道死開河
作悲開河

丈夫乍可道路死揮淚聽我開河篇開河五月暑有毒
亢暎百日河無泉枯蓬赤烏汗如雨長夜白鳥雄似鷓
遊子去家三千里况復病體累十年祇知出門多歷覽
誰料來日當大難木皮束棺靈寄寺縣吏檢尸巫布筵
憶昔當時別家日父母挽留妻子牽自言省弟到上國
自謂賦命天無偏地豈長沙人賦鵬道如陋巷鬢凋蟬
弟不及見親已遠奈此半路連棄捐重泉杳杳不復旦
遊魂黯黯何由還相逢親舊煩附信南到會稽北到燕

堂上老親嗔惡夢閨中少婦焚紙錢
長安空悲聽雨約
旅館那得共被眠
哭夫哭兄兼哭子
呼神呼地復呼天
一死辛酸尚堪忍
兩地嗚咽真可憐
君不見封侯無成
向沙漠馬革裹屍猶是賢

重廿五行

予憂居海鄉寄生理於稼圃今歲壬午連遭天災前
月一風今月一雨咸為異常况值七八月之間傷農
特甚慨然遠懷命筆識之題曰重廿五行紀時變也

前月今日風若掣手
今日雨不絕頽垣敗壁補未完
注棟傾盆勢尤烈對床不辨兒女啼懸天但恐星河決
遙看密瀉同織絲復有大片如飛雪夜來霑灑愁圖書
似聞揮霍鳴金鐵昨聽父老指顧言目數羣龍迸空裂
海中沙縣全城翻邑裏譙樓半腰折皇天高照正森嚴
聖主中興自超軼豈伊玄化復偶然無乃蒼生自詒孽
擁衾轉輾苦待明四野茫茫混魚鼈未頭生耳須浪傳
竈底產蛙幸虛設不然東南財賦區寧免宵旰勞符節

小臣幽憂才一家終歲饑寒詎堪說仰天端拜意獨深
捧日何能計應拙挽回光霽敢望多今夕明朝事終別

金陵行

鍾山鬱嵒峩冉冉朝出雲昔日秦始皇於此埋黃金埋
金空復爾千載悲歎深石頭逸其右長江亘其陰我祖
造帝業此地遂發靈雙觀切雲霄宮殿何森森下有高
樓臺甲第竒丹青縉紳羅其中白馬揚金鈴山川此都
會登眺亦崢嶸送君金陵去歌我金陵行

江南行

送鄧良仲
尹崑山

僕本江南士請歌江南篇江南佳且麗沃野多良田道
旁采桑女湖中木蘭船禮讓季札後文學言偃前崑山
產良玉自古盛才賢東通滄海波西接闔城煙既饒魚
稻利復當大有年登眺何鬱鬱井市互糾纏商賈競啓
關逋流願受屨使君楚邦彥敷治若烹鮮新從天上來
端坐理徽絃齊民本同性嗜好貴有先谷中自虛曠豈
曰聲難傳酌酒聽我歌我歌慎勿諼

傷哉行

挽何處士

傷哉薤露日欲午昨日草堂辭故主黃梁已熟夢初回
百歲相將一抔土北邙山下紙錢風杜鵑聲中寒食雨
畱得功名上墓碑行人立馬淚如縷椒漿滿地不勝愁
日落玄猿為起舞流傳義事死不泯會有餘休大門戶

蜀山行

悲安處士

蜀山何蒼蒼蜀江何湯湯江山相望鬱不改中有懷賢
淚幾行淚行灑向嘉州道嘉州高士忽已老高士墳前

四尺碑北風細雨搖白草至今人傳高士德侍母能吞
病回食讀書千卷老不忘白首猶能數行墨有文孫曾
振其武巍科達官相次取千秋萬歲安家祠瓜瓞綿綿
稱始祖

駿馬行

贈別殷
近甫

殷子有奇骨昂藏若駿馬康莊在遠道伏櫪甘土苴長
安一朝別我去再三挽留不能住潞河新有下灘船到
家正及朱炎暮君家本在齊魯墟楓林瑟瑟臨前除小

樓畫檻蔭林樾中有先世千卷書北堂慈母髮垂領倚
門望兒悲短景小弟今年十四五弄筆時時學馳騁上
奉母顏下課弟日有餘功擬叢桂病骨偏宜秋氣涼藥
囊閒却參苓劑登高迴睇望泰山恍見仙人時往還翩
翩白鶴不可借流光日夜凋朱顏朱顏一往那再復惟
有功名留汗竹志士偏增日暮悲佳人易感窮途哭憶
昔虛堂坐論文辭鋒往往傾先秦談時屈指數漢魏歎
息六代何無人殷子竒氣鮮有匹人間八寶光耀日吳

郡徐卿吾畏友，每每到君賞高逸。君不見九方臯，胡能
按譜索馬毛。願子加飡善自愛，天閑十二終當泰。爾曹

畫松行

為鄭啓
範題

畢偃去已遠，馬夏新有聲。攜將秦大夫，從事褚先生。幽
篁壓枝兔絲颺，雪後冰前儼相向。淺紅膩紫多好顏，端
合低頭丈人行。螭龍一夜聞雷起，况復笙篁風滿耳。縣
齋晝靜簾影重，聊伴詩書當行李。君不見前年營建採
山林，竹頭木屑俱千金。天南別有擎空樹，迴巖疊嶂深。

更深豈不中梁棟地僻誠難尋由來才大難為用始覺
良工真苦心

東家行

東家有女嫁西家不羞白壁倚蒹葭結髮初疑連理樹
牽情復比並頭花並頭連理願千秋夫壻今年輕薄遊
鬪雞遠過夷門市繫馬時從白下樓鬪雞繫馬聊應爾
可憐年華付流水月離三五弓下弦春當九十花成子
千疊關山音信稀傳言絕塞寄征衣身騎大宛烏龍去

手取將軍金印歸烏龍金印兩難成邊境蕭條不可行
黃沙萬里雙睛暗白雪千山五月明風月空閨難獨守
團扇絺衣豈堪久箜篌弦上公渡河羌笛聲中折楊柳
楊柳秋來滿故園良人何日返東門黃金繞身久離別
不如貧賤暫溫存

西州門行

悵望西州路經年感舊恩嘗因石頭醉不覺至州門至
州門應慟哭輿疾歸來塵滿目羯兒江上兵八千鼉子

車中年十六蒼生滿地終奈何一枕白雞春夢足中原
心東山志兩難憑俱不遂幾人能有羊曇淚

分金行

古人重結交何必千萬人一一苟知己安得各許身嗟
哉管鮑交跡遠心逾親後來相齊功寧令負分金

猛虎行

天生爾物何雄發咆哮一聲振林樾俵魂離離腥風動
山下行人豎毛髮乳子曾聞昔擾馴食牛誰料今搪突

太山啼婦那忍聞
血肉縱橫疊枯骨
君不見東家近日
射生手彎弓百步能穿柳

射虎行

海墺饒稻梁日夕滿
牛羊忽傳虎南下
遠見目炬光腥
風獵獵振林木
前村驚走後村哭
南衙仙尉滇南才
白馬彫弓美如玉
太平寺西日卓午
一箭殺虎如殺鼠
長官迎勞吏歡呼
負嵎長嘯今何處
君不見南山白額長
橋蛟眼中此尉人中豪

擬飲馬長城窟行

密密牆頭柳淒淒野中露徘徊念遠人即目不成覩別
離誰不然相思逐流年日短願夜長夢中得相憐食茶
知味苦登高知路長耿耿懷隱憂雙輪繞柔腸客來異
鄉縣遺我一匹絹雙手認封題中有夫壻書上言紫貂
弊下言近瘦肥持刀欲裁衣仍將比殘機

四言古詩

四首

邃菴

為師相楊
先生賦

時惟文明篤生哲人若大廈斯構巨木既掄江漢濯靈
于國之南來游來觀有茲邃菴於穆邃菴莫長安之里
先民有言人遠室邇仞墻既闢朗牖載啓邁心昭曠崇
志玄始承明既下遵此深閤耿耿渠渠以造爾後生孰
曰一室而匪八荒君子善居旁達煌煌凡此煌煌惟邃
之功故嶽深則蓄川匯攸同誕求明德茲菴是出出則
外攘入則內謐庸是基程光我王室帝用勤止僉曰允
諧三事是寄以陟崇階對揚休命執德不回秉國之鈞

邃茲弘開孰求勿獲胡致匪才以延我基緒於皇遐哉

修竹篇三章


孝子備物以奉親物取於備孝之至也

瞻彼修竹薄言矐之依依庭除託植在茲我悅我親以
况其儀竹之苞矣以慰我思

瞻彼修竹其色如玉春言顧之豈曰空谷出則爾恭入
則爾復君子之居清風穆穆

瞻彼修竹鳳凰于飛歲聿云莫泥泥有輝崇是正直以

保中虛君子萬年神明所依



儼山集卷四